

Surat khabar: Utusan Sarawak (Tempatan)

Hari/Tarikh: 7/9/2013

Muka surat: 6

Tajuk : Unimas Sasar Lima Peratus Pelajar Antarabangsa.

Unimas sasar lima peratus pelajar antarabangsa

KOTA SAMARAHAN, Jumaat – Universiti Malaysia Sarawak (Unimas) sudah mencapai sasaran dalam pengambilan pelajar dua tahun lebih awal apabila jumlah penuntut terkini universiti itu ialah 15,600 orang.

Naib Canselor Unimas, Profesor Dato' Dr. Mohamad Kadim Suaidi berkata, seramai 15,000 pengambilan pelajar universiti berkenaan menjelang tahun 2015 ternyata pihaknya melepassi sasaran pada tahun ini.

"Ini adalah satu pencapaian yang membanggakan dalam program transformasi pendidikan. Kita turut mensasarkan lima peratus pengambilan pelajar antarabangsa dari 31 buah negara di seluruh dunia.

"Setakat ini, kita hanya mempunyai 82 orang pelajar antarabangsa. Maka, masih banyak peluang untuk kita menambah bilangan pelajar antarabangsa dan kita sedang usa-

hakan," katanya.

Beliau berkata demikian pada sidang media selepas majlis Ikar Pelajar Ambilan September 2013/2014 di Unimas di sini, hari ini.

Mengulas lanjut pengambilan pelajar tersebut, beliau berkata, seramai 3,642 pelajar yang mendaftar yang terdiri daripada 68 peratus adalah pelajar wanita manakala 32 peratus merupakan pelajar lelaki.

"Daripada jumlah itu, 30 peratus pelajar mengambil jurusan sains dan teknologi sementara selebihnya mengambil jurusan sains sosial, ekonomi dan pengurusan. Selain itu, kita mempunyai dua orang pelajar Orang Kelainan Upaya (OKU).

"Justeru, Unimas sudah dikenali oleh calon-calon yang memohon untuk kemasukan di sini. Kita turut menyediakan kemudahan tertentu

untuk golongan OKU meskipun masih belum mencukupi tetapi kita terus berusaha memperbaiki perkhidmatan kepada mereka," jelasnya.

Katanya, Unimas mengeluarkan 4,500 tawaran dan mungkin jumlah pendaftaran pelajar akan terus meningkat memandangkan terdapat proses rayuan dan pendaftaran lewat selain 450 pelajar mendaftar di bawah program Sarjana serta Doktor Falsafah (PHD).

Hadir sama, Menteri Kebajikan, Wanita dan Pembangunan Keluarga, Datuk Hajah Fatimah Abdullah, Timbalan Naib Canselor (Akademik dan Antarabangsa), Prof. Dr. Fatimah Abang, Timbalan Naib Canselor (Penyelidikan dan Inovasi), Prof. Dr. Peter Songan dan Timbalan Naib Canselor (Hal Ehwal Pelajar dan Alumni), Prof. Mohd Fadzil Abdul Rahman.